

# Kulturikkut eriagisassat eqqissimatitaanerat pillugu Inatsisartut inatsisaat

## Kapitali 1

### *Siunertaa nassuiaataalu*

**§ 1.** Inatsisartut inatsisaatigut kulturikkut eriagisassat immikkoorutillit allanngorartullu illersorneqassapput Kalaallit Nunaata kulturikkut kingornutassiaasa ilaattut aammalu Kalaallit Nunaata oqaluttuarisaaneranut paasinninnissamut tapertatut. Kulturikkut eriagisassat tamakku ukiut tuusintilikkaat ingerlanerini inuit suliaqartarsimanerinit takussutissaapput inuiaqatigiillu pilersitsisut saqqumilaarnissaannut.

*Imm. 2.* Kulturikkut eriagisassat nukissatut eriagisassatut, ilisimatusarnermi paasissutissanik aallerfissatut aammalu massakkut inuusunut siunissamilu kinguaariit misigisaqarnissaannut, imminnut paasinissaannut, ilorrisimaarnissaannut naparliinnannginnissaannullu qaqugumut tunngavilersuisussatut nunami maani pisussaaffeqarnitsinnut Inatsisartut inatsisaat ilaavoq.

*Imm. 3.* Inatsisartut inatsisaata Kalaallit Nunaata kulturikkut kingornutassiaa nunarsuarmiut inuillu oqaluttuarisaanerannut pingaarutilimmik akuusoq isumagaa, eqqissimatitsinissarluk siunertarlugu suliniuteqarneq aqputigalugu Kalaallit Nunaat nunarsuarmioqatigiit kulturikkut kingornutassiiniarnerannut peqataalluni.

**§ 2.** Kulturikkut eriagisassat inatsimmi matumani pineqartut tassaapput qanganitsat eriagisassat imaaliinnarlugit peerneqarsinnaanngitsut, kiisalu kulturikkut oqaluttuarisaaneranut sumiiffiit pingaarutillit.

*Imm. 2.* Nunap qanga nunasiaalersimaneranut tunngatillugu, tak. § 5, imm. 1, inatsimmi matumani pineqarput:

- 1) Ikerasassuup kujataani nuna aallarnerfigalugu, Uummannarsuaq kujaqqullugu aammalu Kitaani avannamut 75° N tikillugu, ukioq 1800.
- 2) Kalaallit Nunaata sinnerani, tassalu Ikerasassuup avannaani nuna aallarnerfigalugu Tunup avannaa aqqusaarlugu kitaani ammut 75° N tikillugu, ukioq 1900.

## Kapitali 2

### *Qanganitsat eriagisassat imaaliinnarlugit peerneqarsinnaanngitsut*

**§ 3.** Kapitalimi uani pineqarput nunami imartamilu qanganitsat eriagisassat imaaliinnarlugit peerneqarsinnaanngitsut aammalu illutoqqanut ukiut 100-t sinnerlugit pisoqaassusilinnut atorineqanngitsunullu atuutsinneqarluni.

**§ 4.** Qanganitsat eriagisassat imaaliinnarlugit peerneqarsinnaanngitsut tassaapput inuit suliaqartarsimanerinit takussutissat qangali qimanneqarsimasut taamaatsillugillu inissinneqarsimasut.

**§ 5.** Nunatta Katersugaasiviata aalajangiiffigisarpai iliveqarfiit atorunnaakkat, tupeqarfikut nunasiaalernerup kingornaneersut, inussuit, narsaatit tamakkunanilu ujaqqanik assequtaliussat piuinnaarnissaat oqaluttuarisaanermut annertuumik pingaarteqartut eqqissisimatitaalnissaat.

*Imm. 2.* Qanganitsat eriagissassat imaaliinnarlugit peerneqarsinnaanngitsut allat eqqissisimatitaapput.

*Imm. 3.* Eqqissisimatitassanngortitsinerup kingunerissavaa eqqissisimatitassanngortitat innarlernerqannginnissaat, allanngortinneqannginnissaat imaluunniit tamakkiisumik ilaannakortumilluunniit nuunneqannginnissaat.

*Imm. 4.* Qanganitsanit eriagissassaniit imaaliinnarlugit peerneqarsinnaanngitsuniit 20 meterisut ungasitsigisup iluani nunalerinikkut ingerlatsisoqarsinnaavoq qanganitsanullu eriagissassanut orniguttut aqqusineeraliunneqarsinnaallutik. Nunalerinikkut ingerlatanut ilaapput nunap qaavaniit 15 cm tikillugu itissusilimmut nunap qaavanik nalimmatserineq, naggorissaaneq, naasussaliineq kiisalu nunatap ivigartortitsivittut atorneqarnera. Nunalerinikkut ingerlatanut allanut, matumanittaaq ujaraajaanissamut kiisalu paasissutissanut nivinngaavinnik, eqqaavinnik allanullu inuit qanganitsanut eriagissassanut imaaliinnarlugit peerneqarsinnaanngitsunut tikitsisinnaanannerannut iluaqutaasinnaasunik ikkussinissamut Nunatta Katersugaasivia akuersissuteqarsinnaavoq.

*Imm. 5.* Qanganitsanit eriagissassaniit imaaliinnarlugit peerneqarsinnaanngitsuniit 2 meterisut ungasitsigisup iluani allatut iliuuseqartoqaqqusaanngilaq.

**§ 6.** § 5, imm. 3-miit 5-imut aalajangersakkat sanioqqunneqarnissaat Nunatta Katersugaasiviata akuersissutigisinnaavaa.

**§ 7.** Atuisut nunaminertamik atuinissamut akuerineqarsimasut, kommunalbestyrelsit, pisortani oqartussat sumiiffinnilu katersugaasiviit akuerisaasut qanganitsanik eriagissassanik imaaliinnarlugit peerneqarsinnaanngitsunik eqqissisimatitassanngortitsinissaq pillugu suliassanik kiisalu taakkuninnga allanngortitsinissamik atorunnaarsitsinissamilluunniit suliassanngortitsisinnaapput. Tamatuma saniatigut Nunatta Katersugaasivia nammineerluni suliassanngortitsisinnaavoq.

*Imm. 2.* Nunatta Katersugaasivia qanganitsat eriagissassat imaaliinnarlugit peerneqarsinnaanngitsut eqqissisimatitanngornissaat kiisalu taakkuninnga allanngortitsinissamik imaluunniit atorunnarsitsinissamik aalajangiisussaavoq.

*Imm. 3.* Imm. 2 malillugu Nunatta Katersugaasivia aalajangiitinnagu atuisut nunaminertamik atuinissamut akuerineqarsimasut kiisalu kommunimi qanganitsat eriagissassat imaaliinnarlugu peerneqarsinnaanngitsut inissisimaffigisaani kommunalbestyrelsit tusarniaaffigeqqaarneqassapput. Nunatta Katersugaasivia allanik tusarniaasinnaavoq.

*Imm. 4.* Eqqissisimatitassanngortitsinermik aalajangiinerit Namminersornerullutik Oqartussat nit-tartagaatigut ingerlaannartumik tamanut saqqummiunneqartassapput.

**§ 8.** Qanganitsat eriagissassat imaaliinnarlugit peerneqarsinnaanngitsut, matumanittaaq qanganitsat eriagissassat imaaliinnarlugit peerneqarsinnaanngitsut sorliit, eqqissisimatitaanersut Nunatta Katersugaasiviata nalunaarsussavai.

*Imm. 2.* Nunatta Katersugaasiviata nakkutigissavai qanganitsat eriagissassat imaaliinnarlugit peerneqarsinnaanngitsut inatsit manna tunngavigalugu eqqissisimatitassanngortitaasimasut.

*Imm. 3.* Nunatta Katersugaasiviata aningaasanut inatsimmi aningaasaliissutit iluini qanganitsat eriagissassat imaaliinnarlugit peerneqarsinnaanngitsut pingaarnersaasa aserfallatsaaliineqarnissaat isumagissavaa.

*Tigussaasumik pilersaarusiornermut aammalu assaanissamut piareersarnermut atasumik qanganitsat eriajisassat imaaliinnarlugit peerneqarsinnaanngitsut isumannaarneqarneri*

**§ 9.** Nunatta Katersugaasiviata nunamik atuinermit atortussiassanullu oqartussaasut susassaqtullu allat nunap pisuussutaanik atuinermit suliaqartut suleqatigalugit sulissutigissavaa qanganitsat eriajisassat imaaliinnarlugit peerneqarsinnaanngitsut taakkulu paasisutissat tunniussaasut siunissamut qulakkeerneqarsimanissaat.

*Imm. 2.* Nunamik atuinermit atortussiassanullu oqartussat pilersaarusiorneq akuersissutillu qanganitsanik eriajisassanik imaaliinnarlugit peerneqarsinnaanngitsunik attuisinnaasut suliaritillugit Nunatta Katersugaasivia akulerutsittassavaat.

*Imm. 3.* Annertuumik assaasoqassatillugu pilersaarusiornermi sanaartortitsisup Nunatta Katersugaasivia akulerutsissavaa.

*Imm. 4.* Sumiiffinni pineqartuni imm. 2 aamma 3 naapertorlugit suleqataasussat ilaatillugit Nunatta Katersugaasiviata allagaateqarfiit atorlugit qanganitsat eriajisassat imaaliinnarlugit peerneqarsinnaanngitsunik peqarsinnaanera pillugu nakkutilliineq ingerlatissavaa.

**§ 10.** Sanaartortitsisup imaluunniit misissueqqaarnernik assaanernilluunniit matussusiisussap, suliap aallartinnginnerani Nunatta Katersugaasivia qinnuigisinnavaa nunap pineqartup qanganisarsiornikkut naliliivigineqarnissaanik. Sanaartortitsisoq imaluunniit misissueqqaarnermut assaanermulluunniit akiliisussaq aningaasartuutitut matussusiisaaq.

*Imm. 2.* Nunatta Katersugaasiviata nalilerpagu nunami pineqartumi qanganitsanik eriajisassanik imaaliinnarlugit peerneqarsinnaanngitsunik peqartoq Nunatta Katersugaasivia aalajangersinnaavoq qanganisarsiornikkut misissuivigineqassasut. Qanganisarsiornikkut misissuineq qaammatit 18-it qaangiutsinnagit piviusunngortinneqariisaaq immikkut pisoqarsimatinnagu.

*Imm. 3.* Sanaartortitsisup imaluunniit assaanermut matussusiisussap qanganisarsiornikkut misissuinermit aningaasartuutitut matussusiisavai. Misissuinerup aallartinnginnerani misissuinermit atasumik Nunatta Katersugaasivia missingersuusiisaaq.

*Imm. 4.* Inuit nammineerlutik annikinnerusumik nunami assaaneranni qanganisarsiornermi misissuinermit Naalakkersuisut tamakkiisumik ilaannakortumilluunniit aningaasartuutitut matussusiisinnaapput, tak. imm. 2 aamma 3, aningaasartuutitut nammineq sanatitsisumut naleqqutinngitsumik artukkiissappata.

*Imm. 5.* Nunami assaanerit qanganitsanik eriajisassanik imaaliinnarlugit peerneqarsinnaanngitsunik imaluunniit qanganisarsiornikkut misissuinermit attuisussaannngitsut aallartinneqarnissaat Nunatta Katersugaasiviata aalajangiiffigissavaa. Aalajangiinnermi pingaartinneqassapput qanganitsat eriajisassat imaaliinnarlugit peerneqarsinnaanngitsut illersorneqarnissaat, qanganisarsiornikkut misissuinerit ingerlanneqarnissaasa isumannaarneqarnissaa, assaanerup aallartinneqarnissaanut periarfissat aamma inuussutissarsiornikkut soqutigisat pingaaruteqartut.

*Assaanerup nalaani qanganitsat eriajisassat imaaliinnarlugit peerneqarsinnaanngitsut nassaarineqartut*

**§ 11.** Assaanerup nalaani qanganitsamik eriajisassamik imaaliinnarlugu peerneqarsinnaanngitsumik naammattuuisoqarpat sanaartortitsisup nassaarneq erngertumik Nunatta Katersugaasivianut nalunaarutigissavaa, suliarlu qanganitsamik eriajisassamik imaaliinnarlugu peerneqarsinnaanngitsumik attuisoq unitsinneqassaaq. Nunatta Katersugaasiviata aalajangissavaa qanganisarsiornikkut

misissuineramik aallartitsisoqassanersoq, tak. § 10, imm. 2-miit 4-mut, imaluunniit eqqissisimatitsinissaq siunertaralugu suliamik aallartitsisoqassanersoq, tak. § 5.

**§ 12.** Nunatta Katersugaasivia qanganitsat eriagissat imaaliinnarlugit peerneqarsinnaanngitsut assaaviginissaannut akuersissut aammalu nassaat pillugit suliffeqarfinnut allanut imaluunniit ilisimatusarnikkut soqutigisaqaqatigiinnut ingerlatitseeqqiisinnaavoq, akuersissutinullu atasumik piumasaqaasiorluni.

### Kapitali 3

#### *Illutoqqat aammalu kulturikkut oqaluttuarisaanermut sumiiffiit pingaarutillit*

**§ 13.** Illutoqqat aammalu kulturikkut oqaluttuarisaanermut sumiiffiit pingaarutillit oqaluttuarisaanermut imaluunniit ilusilersueriaatsimut piunnarnissaat pingaaruteqarpat eqqissisimatitassanngortinneqarnissaat Nunatta Katersugaasiviata aalajangiiffigissavai.

*Imm. 2.* Illutoqqanik eqqissisimatitassanngortitsinermi pineqarsinnaapput:

- 1) Illutoqaq tamarmi,
- 2) Illutoqaq silarlikkut ilusaa,
- 3) Illutoqaq immikkut sannai ataasiakkaat.

*Imm. 3.* Kulturikkut oqaluttuarisaanermi sumiiffinnut pingaarutilinnut ilaapput kulturikkut eriagissat assigiinngitsut imminnut ataqatigiinnerat imaaluunniit sumiiffimmut aalajangersimasumut immikkut pisimasoqarfusunut attuumassuteqartut.

*Imm. 4.* Eqqissisimatitassanngortitsinermut aamma ilaasinnaapput illutoqqap imaluunniit kulturikkut oqaluttuarisaanermut sumiiffiup pingaarutillip toqqaannartumik avatangiisai, ataatsimut isiginnilluni illersortariaqartitat.

**§ 14.** Illutoqaq imaluunniit kulturikkut oqaluttuarisaanermut sumiiffik pingaarutilik piginnittunit isumannaatsumik aserfallatsaaliineqassaaq eqqissisimatitassanngortitsinermut naapertuuttumik. Nalinginnaasumik aserfallatsaaliuineq pissaaq atortussat, periutsit qalipaattillu maannamut atorneqartut atorlugit illutoqqallu imaluunniit kulturikkut oqaluttuarisaanermut sumiiffiup eqqissisimatitassanngortitaasimasup eqqissisimatitassanngortitsinerup nalaani qanoq issusia isikkualu naapertorlugit.

*Imm. 2.* Illutoqqami eqqissisimatitassanngortitami aamma kulturikkut oqaluttuarisaanermut sumiiffimmi sunilluunniit sanaartornerit Nunatta Katersugaasivianit akuerineqaqqaartussaapput, suliaq illutoqqap ilaanut eqqissisimatitassanngortitsinermi pineqartunut ilaappat, aammalu suliaq nali-nginnaasumik aserfallatsaaliinermi annertuneruppat. Nunatta Katersugaasivia akuersissummut atasumik piumasaqaateqarsinnaavoq.

*Imm. 3.* Qinnuteqartoqareerneratigut Nunatta Katersugaasivia aalajangersinnaavoq illutoqqami eqqissisimatitassanngortitami aserfallatsaaliuinerimut imaluunniit sanaartornerimut imaluunniit kulturikkut oqaluttuarisaanermut sumiiffimmi pingaarutilimmi sanaartornerimut aningaasartuutit aningaasanut inatsisikkut aningaasaliissutit iluanni tamakkiisumik ilaannakortumilluunniit aningaasartuutigineqassasut.

**§ 15.** Illutoqqat aamma kulturikkut oqaluttuarisaanermut sumiiffiit pingaarutillit § 13 naapertorlugu eqqissisimatitassanngortitat Nunatta Katersugaasiviata nalunaarsussavai.

*Imm. 2.* Nunatta katersugaasiviata nakkutigissavai illutoqqat kiisalu kulturikkut oqaluttuarisaanermut sumiiffiit pingaarutillit inatsit manna malillugu eqqissisimatitassanngortitaasimasut.

*Imm. 3.* Nunatta Katersugaasiviata aningaasanut inatsimmi aningaasaliissutit iluini illutoqqat kiisalu

kulturikkut oqaluttuarisaanermut sumiiffiit pingaarutillit eqqissimatitassanngortinneqarsimasut aserfallatsaalineqarnissaat isumagissavaa.

*Kulturikkut kingornussat pillugit siunnersuisoqatigiit*

**§ 16.** Kulturikkut kingornussat pillugit siunnersuisoqatigiit 3-nik ilaasortaartoq, ilusilersuineri, qanganisarsiorneri kulturikkullu oqaluttuarisaanermut ilisimasaqartunit inuttaqartussaq Kultureqarneri Naalakkersuisup pilersissavaa. Kulturikkut kingornussat pillugit siunnersuisoqatigiinni ilaasortat Kultureqarneri Naalakkersuisup siullermeerluni toqqassavai inatsip matuma atuutilersinneqarnerata kinguinnguatiq.

*Imm. 2.* Eqqissimatitassanngortitsinissamik suliaq pillugu, tak. § 17, Kulturikkut kingornussat pillugit siunnersuisoqatigiit kaammattuuminik tunniussaqaassapput aammalu § 14 naapertorlugu akuersissutitut atattillugu tusarniaavigineqaassallutik. Taakku saniatigut illutoqqanik kulturikkullu oqaluttuarisaanermut sumiiffiit pingaarutillit eqqissimatitassanngortinneqarnissaannut tunngasuni assigisaanilu siunnersuisutut inissisimassaaq.

*Imm. 3.* Kulturikkut kingornussat pillugit siunnersuisoqatigiinnut Nunatta Katersugaasivia allatseqartitsissaaq.

*Eqqissimatitassanngortitsineri suleriaatsit*

**§ 17.** Piginnittut, atuisut atuissamat akuersissutaatillit, naalagaaffik, kommunit, sumiiffinni katersugaasiviit aammalu peqatigiiffiit taamaaliornissamat Nunatta Katersugaasivianiit akuerineqarsimasut eqqissimatitassanngortitsinissaq pillugu sulianik kiisalu taassuminnga allannguinnissaq imaluunniit atorunnaarsitsinissaq pillugu aallartitsisinnaapput. Taamatuttaaq Nunatta Katersugaasivia tamanna pillugu nammeneq suliamik aallartitsisinnaavoq.

*Imm. 2.* Eqqissimatitassanngortitsinissaq kiisalu taassuminnga allannguinnissaq imaluunniit atorunnaarsitsinissaq pillugu Nunatta Katersugaasiviata aalajangiinnissaa sioqqullugu inuit tamat, piginnittoq, atuisut nunaminertamik atuissamat akuerineqarsimasut kommunilu illutoqqap imaluunniit kulturikkut oqaluttuarisaanermut sumiiffiup pingaarutillip inissisimaffigisaa nalunaarfigineqaassapput. Nalunaarnissamat piffissaliussaq qaammatit 3-upput, piffissap taassuma iluani susassaqaartut oqaaseqaateqarnissaminut periarfissaqaassallutik. Taamatullu Kulturikkut kingornussat pillugit siunnersuisoqatigiit kaammattuuteqaassapput, tak. § 16, imm. 2.

*Imm. 3.* Nalunaarutip nalunaarutigineqarneraniit eqqissimatitassanngortitsinissamat eqqarsaatigineqartumut akornutaasinnaasumik ajornakusuulersitsisumilluunniit iliuuseqartoqaassanngilaq.

*Imm. 4.* Eqqissimatitassanngortitsinissamik kiisalu taassuminnga allannguinerit atorunnaarsitsinerilluunniit Nunatta Katersugaasiviata aalajangiiffigissavai.

**§ 18.** Eqqissimatitassanngortitsinerit, taakkuninnga allannguinerit imaluunniit atorunnaarsitsinerit, tamanna pillugu aalajangiinnermiit ullut 14-it qaangiutsinnagit, Nunatta Katersugaasiviata tamanut nalunaarutigissavai. Piginnittoq, atuisut nunaminertamik atuissamat akuerineqarsimasut kommunilu sanaartukkap imaluunniit kulturikkut oqaluttuarisaanermut sumiiffiup pingaarutillip inissisimaffigisaa toqqaannartumik ilisimatinneqaassapput.

*Imm. 2.* Illutoqqanik eqqissimatitassanngortitsinerit pillugit aalajangiinerit Nunatta Katersugaasiviata piumasaqaateqarneratigut Nunatta Eqqartuusivianiit nalunaarsorneqaassapput. Piginnittut nikinneri

Nunatta Eqqartuusiviata Nunatta Katersugaasivianut nalunaarutigissavai.

*Imm. 3.* Illutoqqamut imaluunniit kulturikkut oqaluttuarisaanermut sumiiffimmut pingaarutilimmut atuisinnaatitaasut tamarmik eqqissimatitassanngortitsineq ataqqissavaat, atuisinnaatitaaneq qaqugukkut pilersimanersoq apeqqutaatinnagu.

#### Kapitali 4

*Pigisanik aalaakkaasunik arsaarinnittarneq naammagittaalliornissamullu periarfissat*

**§ 19.** Inatsisartut inatsisaat manna malillugu eqqissimatitassanngortitsinissap naammassineqarnissaanut tamanna pisariaqarpat pisortat arsaarinninnerisigut pineqartumik piginnittuulernissamut Naalakkersuisut piginnaatinneqarput. Pisortat arsaarinninnerat pissaaq pigisanik aalaakkaasunik arsaarinnissuteqartarneq pillugu Inatsisartut inatsisaanni maleruagassat malillugit.

**§ 20.** Inatsisartut inatsisaat maanna naapertorlugu Nunatta Katersugaasiviata aalajangiineri Naalakkersuisunut allakkatigut naammagittaalliutigineqarsinnaapput.

*Imm. 2.* Naammagittaalliorsinnaatitaapput:

- 1) Kinaluunniit aalajangiinermi pineqartoq,
- 2) Kinaluunniit inuttut imaluunniit suliap qanoq inernejarnissaanik immikkut annertuumik soqutigisaqartoq.

*Imm. 3.* Naammagittaalliornissamut piffissarititaavoq aalajangiinerup aalajangiinermi pineqartumut ulloq nalunaarutigineqarfianit sap. akunneri sisamat (4). Piffissaliussap qaangiutinnginnerani naammagittaalliut aalajangiinermit pineqartumut kinguartitsinermik sunniuteqassaaq naammagittaalliutinut oqartussaasoq allatut aalajangiinngippat.

*Imm. 4.* Naalakkersuisut piffissaliussamut killigigitap qaangerneqarsimanera atuutinngitsoorsinnaavaat, pissutsit immikkut illuinnartut taama iliornissaq pisariaqartilissappassuk.

*Imm. 5.* Naalakkersuisut aalajangiineri allaffissornikkut sulialinnut allanut ingerlateqqinneqarsinnaanngillat.

#### Kapitali 5

*Pineqaatissiissutit*

**§ 21.** § 5, imm. 3-miit 5-imut, § 11, oqaaseqatigiinnik siullernik, § 14, imm. 1-imik aamma 2-mik, aamma § 17, imm. 3-mik unioqqutitsinerit akiliisussanngortitaanermik kinguneqarsinnaapput.

*Imm. 2.* Unioqqutitsineq suliffeqarfimmit tamakkiisumik ilaannakortumilluunniit naalagaaffimmi oqartussaasumit, Namminersornerullutik Oqartussanit, kommunimit imaluunniit kommunit ataatsimooqatigiiffianit kommunalbestyrelsit nunaqarfinnilu aqutsisut il.il. pillugit inatsisartut inatsisaanni pineqartunut ilaasumit, aktiaateqarluni ingerlatseqatigiiffimmit, piginneqataassuteqarluni ingerlatseqatigiiffimmit, piginneqatigiilluni ingerlatseqatigiiffimmit imaluunniit inatsisilerinermit pissusaasumit piliaappat suliffeqarfik il.il. taamaattut pinerluttulerinermit inatsisit malillugit akisussaatinneqarsinnaavoq. Tamannattaq atuuppoq unioqqutitsineq Namminersornerullutik Oqartussanit, kommunimit imaluunniit kommunit ataatsimooqatigiiffianit kommunalbestyrelsit nunaqarfinnilu aqutsisut il.il. pillugit inatsisartut inatsisaanni pineqartunut ilaasumit piliaappat.

*Imm. 3.* Unioqqutitsinikkut iluanaarutit pissarsiat arsaarinnissutigineqanngippata akiligassiissutip annertussusilerneqarnerani iluanaarutaasimasut annertussusaat qissimigaarneqassapput.

## Kapitali 6

### *Atortuulersitsineq il.il.*

**§ 22.** Inatsisartut inatsisaat manna 1. januar 2008-mi atortuulerpoq. Tamatuma peqatigisaanik Qanganitsanut eqqaassutissat imaaliinnarlugit peerneqarsinnaanngitsut illullu eqqissisimatinneqarnerat pillugu Landstingip inatsisaa nr. 5/1980, 16. oktober 1980-meersoq, Kalaallit Nunaanni qanganitsanut eqqaassutissat innimigineqarnissaat pillugu malittarisassaq nr. 118, 1948-meersoq aamma qanganitsanut eqqaassutissat innimigineqarnissaat pillugu sysselmandinut kajallaasitaq 11. november 1948-meersoq atorunnaarsinneqarput.

**§ 23.** Eqqissisimatitassanngortitsinerit inatsisartut inatsisaat manna naapertorlugu eqqissisimatitassanngortitsinernik taarsiisuunngitsut atortuujunnaarsinneqarnissamik tungaanut atortuutinneqarput.

*Namminersornerullutik Oqartussat, ulloq 19. november 2007*

Hans Enoksen

/

Tommy Marø

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut